

Cun in grond **ENGRAZIAMENT**

... lessel jeu entscheiver a scriver il davos Fegl parochial digl onn 2011. Engraziel per igl onn che va a fin, ed in special engraziament per tut la lavur voluntaria ch'ei vegnida prestada en ils pli differents secturs da nossa pleiv.

Jeu vegnel (e speranza era vus) adina puspei pertscharts ch'ina pleiv viventa, sco mintga cuminonza, sa mo „funcziunar“ entras il survetsch voluntari da numerusas persunas.

Numnass jeu tuttas persunas per num, lu dess quei ina gliesta pli liunga che la litania da tut ils sogns. Sch'jeu clomel en memoria tut ils secturs da lavur, lu vegnan bia num e biaras fatschas endament a mi:



LecturAs

Suprastonza

Cussegl pastoral

Calustras, Organists

MinistrantAs, ils Chors

Survetsch divin preeucaristic

Gruppa da liturgia, CatechetAs

Devoziuns pils pigns, secretariat

Gidonters per parter ora la s. communiun

ScolastAs, Treis sogns Retgs, Uniun da dunnas

Uniun da Giuventetgna, La Societad da musica Falera

Tuttas persunas engaschadas tier las processions e fiastas.

Nus astgein endriescher e far la biala experientscha che bia dil bien sa sesviluppar, sche nus mussein da cuminonza engaschi per nossa societad, per nossa vischnaunca e per nossa Baselgia.

Persuls fuss quei fetg stentus, e bia fuss insumma buca realisabel. Igl ei – sco en biaras uniuns – adina puspei las medemas fatschas ch'ei promptas da metter a disposiziun lur temps liber per s'engaschar. Secapescha ch'ei dat (bunamein) adina memia paucs, denton oz vala ei d'engraziar sinceramein a tut quellas persunas FIDEIVLAS.

Jeu engraziel cordialmein a tuttas e tuts che han prestau grondiusa lavur duront biaras uras per il beinesser dalla cuminonza da nossa pleiv, e quei el pign ed el grond, el veseivel e nunveseivel. Sch'jeu astgel selegrar ensemen cun tuts voluntaris sin la lavur che seresulta ord lur engaschi – lu ei Nadal.

La via tras igl Advent viers Nadal

Mintga gada, cu enzatgi regala sia carezia ad in auter,
lu ei Nadal.

Mintga gada, cu ils cors ein ventireivels e cuntents,
lu ei Nadal.

Mintga gada, cu ti partas quei che ti has cun l'auter,
lu ei Nadal.

Mintga gada, cu ils carstgauns tonschan il maun in a
l'auter per far pasch,
lu ei Nadal.

Mintga gada, cu gl'jester vegn beneventaus,
lu ei Nadal.

Mintga gada, cu in gida l'auter d'evitar il mal e far
dil bien,
lu ei Nadal.

Lein ir sin via tras igl Advent cun sespruar da viver tenor
quels patratgs – lu ei Nadal.

Vies Sur Peter

Communiun dils malsauns:

Mesjamna, ils 14-12-2011 suentermiezdi

Advent cun ils seniors

Dumengia, ils 4 da december 2011 envida l'Uniun samaritana tut ils seniors alla sentupada d'Advent. Nus sperein che numerus dettien suatientscha a quei invit e giavischein a tuts in legreivel suentermiezdi ed in grazius temps d'Advent.

All'Uniun samaritana engraziein zun fetg per lur engaschi.

Fiasta dil s. Batten

Dumengia, ils 18 da december 2012 retscheiva *Valerio*, fegl da Riccarda e Mario Congo Camenisch il sogn sacrament dil Batten. Nus beneventein *Valerio* cordialmein ella cuminonza da nossa Baselgia. La benedicziun da Diu ed il sustegn dils concartents accumpogni el tras sia veta.

Gratulaziun

La fiasta da Nadal, ils 25 da december 2011 astga Kaspar Schmid festivar siu 80-avel natalezi. Nus gratulein cordialmein e giavischein tut il bien, buna sanadad ed in legreivel di da fiasta.

Devoziun da Nadal avon la stalla

Mesjamna, ils 21 da december 2011, allas 16.00h ein tuttas famiglias e lur affons pigns envidai cordialmein da sentupar en baselgia avon la stalla. Da cuminonza lein esser aviarts per la nuvia da Nadal e sentir la valur religiosa ch'accumpogna nus atras il temps e las fiastas da Nadal e Daniev.

Communiun dils malsauns:

Venderdis, ils 02-12-2011 suentermiezdi

Gievgia, ils 22-12-2011 suentermiezdi

Devoziun da Nadal avon la stalla

Dumengia, ils 18 da december 2011, allas 17.00h ein tuttas famiglias e lur affons pigns envidai cordialmein da sentupar en baselgia avon la stalla. Il smarvegl dils affons ei adina commuentonts. Lein perquei esser aviarts sco els e recepir la nuvia da Nadal cun sia valur religiosa ch'ella possi accumpagnar nus atras il temps e las fiastas da Nadal e Daniev.

La vigelgia da Nadal:

Survetsch divin dil plaid cun giug dils affons

Danovamein astgein nus puspei selegrar la vigelgia da Nadal, ils 24 da december 2011, allas 17.00h en baselgia parochiala, sin il survetsch divin dil plaid. Quel vegn enrihius cun in giug da Nadal dils affons. Nus engraziein cordialmein als affons, alla mussadra Josefina Candrian-Casutt, al scolast Gion Giacun Casutt ed a tuts ch'ei s'engaschai cun tonta bunaveglia e lavur per puder festivar quei survetsch divin. Quei dat alla sera da Nadal in'atmosfera da legria e porta glisch per la fiasta dalla naschientscha da Cristus. Lein festivar quei survetsch divin en cuminonza da nossa pleiv, cun nossas famiglias ed affons.

